

Warga asing didakwa tinggal lebih tempoh sah

MIRI: Seorang lelaki warga asing dihadapkan ke Mahkamah Majistret atas tuduhan tinggal di negeri ini melebihi tempoh sah yang dibenarkan.

Rio Langi, 51, dari Pinderang Sulawesi Selatan, Indonesia, telah didakwa mengikut Seksyen 15 (1) (c) Akta Imigresen 1959/63 (Pindaan 2002) dan dihukum di bawah Seksyen 15 (4) akta yang sama.

Jika sabit kesalahan, boleh didenda tidak kurang dari RM10,000 atau penjara lima tahun atau kedua-duanya sekali.

Berdasarkan pertuduhan kes, tertuduh telah dituduh tinggal di negeri ini melebihi tempoh sah yang dibenarkan dalam pas visa yang dikeluarkan kepadanya.

Dia didakwa melakukan

kesalahan itu pada jam 2.30 petang, 17 Ogos lalu di sebuah rumah tidak bernombor di Ladang Kuntai, Jalan Miri-Bintulu.

Tiada pengakuan salah tertuduh direkodkan.

Terdahulu, pegawai pendakwa Inspektor Mudzilawati Abdul Rahman memohon ditetapkan satu tarikh baharu untuk sebutan lanjut kes itu

di hadapan hakim Mahkamah Sesyen.

Majistret Md. Syafique Md. Hilmie yang mendengar kes itu kemudian menetapkan 10 September ini untuk sebutan lanjut kes di Mahkamah Sesyen.

Sementara itu, tertuduh yang tidak ditawarkan jaminan diperintahkan supaya ditahan lanjut sementara menunggu tarikh tersebut.